

四庫全書

集部

欽定四庫全書

集部

少谷集卷二十四
五

詳校官庶吉士_臣李如筠

中書_臣劉源溥覆勘

總校官知縣_臣楊懋珩

校對官編修_臣沈清藻

謄錄監生_臣施華

欽定四庫全書

少谷集卷二十四

附錄中

題序類

題少谷先生遺稿

方豪

少谷先生詩文若干卷往汪郡守刻之流海內矣獨經世要談子通論道未行余聞先生疾草歎曰詩文小技害道而吾為之吾悔之矣向非石龍南洲二公忠誨夾

持吾有出頭時卽是稿索居時隨得而漫錄者固蕪稿
矣今已矣夫吾死之後可寄此於應黃為黥疵存醇藏
之少谷山使不殞吾晚暮之志朋友講學之功或異日
得自表於世死固樂哉可分是編為上下卷曰經世要
談曰子通論道云悲夫

少谷先生集序

邱齊雲

國朝弘正間址地李崆峒以古文辭倡海內而一時屬
和如晉安鄭少谷者實與伯仲故談藝之士裒然以二

先生為稱首云不佞生也晚未及其門逮官民部閱往牒乃知二公咸用是官起家也于是從署中築吾兼亭日取二公詩文讀之仍作一詩見意亡何聞而和之者數百篇不可知世有同聲哉去歲出守潮謁督學使者碧麓林先生于嶺南手授鄭先生詩文曰是編爾向所讀者盍梓以傳不佞喜甚歸付之梓人閱月畢工竊念之先生何如人哉振衣圖南遨遊漠北聲光奕奕流著海宇乃遭時不弔抗疏削迹中間顛沛流離日晏未炊

然皆處之泰然不少見於顏色至於泉石之事君自以
為為政若而人也豈直一鄉一世之士哉嗟夫以彼其
才使之際清明悉洩所蘊藉未必不追蹤姚張以收黼
黻之功乃齟齬郎署之間不得一日安其位而行其志
竟淪落以死也悲矣然亦以此故得肆力于詩文從今
觀之渾乎若璞澹乎若太羹之味森乎若發武庫而莫
可窮狀也其詩或感激世變時遇幽憂一切規法少陵
至晚年之作又能齊生死一常變彷彿于南華逍遙之

風蓋浸浸乎澤于道德者矣此之為業天壤俱敝也假
令台鼎足重先生乎王元美曰繼之之雄健如黃河積
冰寒色千仞又如石骨巉巖俯入幽澗知言哉今督學
君子先生為甥家學淵源愛而傳之宜也昔者王儀封
初不識先生及卒之日千里遣使紀綱其喪事仍刻其
遺文夫世之士有能使素所未識之士一旦身死之後
而慕之若此者乎其非聲音笑貌之力也必矣則茲督
學君之梓以傳尤非私于先生可知矣李集有全刻乃

先生詩文舊無倫今彙而輯之得二十九卷復以先生
墓碑與輓詩及諸公序文為附錄一卷

題少谷文集

林俊

余亡慧執故滯真無足世道繫也居閒處獨謬意作古
文詞取六經傳記秦漢而上書謬讀之亦謬効之竟無
得其大都如航廣川茫然津涯捕風影無所得鏤脂刻
冰負成勞於工巧又如宿留東萊凡骨未蛻身固在此也
今年年六十六倦以老矣榕人鄭少谷繼之齒後余以倍悟

獨前庚申余過其諸祖藩叅建中少谷尚少語余忘之
矣嗣是少谷文日起伸縮兩儀顛倒萬化輪古今而上
下翫弄作者于掌股之間羣喧就寂靈響効職溯典墳
宗風雅出入莊騷以直附左氏超凡竅詣易吾難如此
也蜩與鴛鴦決起而飛槍榆枋鵬搏扶搖而上者九萬
里凡馬搥策不盡一舍一日千里國馬固能之物諸天
異也抑風之積不厚則其負大翼無力鵬獨運乎哉馬
食日盡粟一石則飽飽則力而材美外見少谷將無是

之遭歟善自愛哉少谷袖稿來雲莊商略其臧否駁純以訂所學噫子實惠我惡置我一喙哉無已則有告焉文寄道者也韓子踔絕翕澄千狀萬態而卒澤於道德仁義炳如也少谷善自愛哉余將焚筆瘞硯以荅子一篇遂強疾仄枕書為別

題少谷文集後

林鉞

鄭子坐余於少谷草堂與論今古之聖賢曠絕於世之傷歧德與文聖邱賢軻德文稱矣后軻之愈愈視軻則

愈固弗若矣聖賢同不同如此其曠絕也已世之邀弊
盡人以詞夫斧藻其詞德之藻矣詞藻寔僻蕩德藻寔
飾華僻蕩飾華時之然也柰之何其弗傷也故曰天下
有道則行有枝葉天下無道則詞有枝葉夫行有枝葉
者根本盛而條達也詞有枝葉者蕪詞曼說佻巧者之
淺是故豪傑之興者世責之賴也鄭子其身之自根本
而達未彊而負望於天下天下之知鄭子者唯曰其能
通乎古之詞矣嗚呼鄭子無通於古之道歟古之道不

為利回不為義疚守道如守官是故鄭子之成也於今之樊橋然而反之正以詞盡人不亦銳乎使未有樹是市人舜裳予決其否也信乎鄭子者於今誠曠絕也况樹乎後者其又臚焉耶余從而卜之也余奚張之哉

題少谷文集後

黃 鞏

傳曰文以足言言以足志不言誰知其志余友少谷久矣讀其近稿乃始得其才識之高意度之廣更歷之久且熟也鄉之知吾少谷不猶淺乎繇是觀之世之人欲

以片言而決底裏一傾蓋而盡得其平生者皆非也雖然少谷之所以自見於世者殆不止此余也又奚足以知之

題少谷文集後

殷雲霄

六經之文天也諸子山川草木也鉅纖醜正不倫亦各有生意矣下此直繪畫耳繼之知文者因以問之

題少谷文集後

王鳳靈

文道之榦也本之則夷而榦是用崇其不可崇朝植也

賊夫道而澤夫文可乎壤殖削榮厚庇之以土以反求其本或有能生者矣昌黎子似之吾用是觀少谷焉漫言乎漫言乎

刻少谷文集

周廷用

少谷子鄭繼之弱冠穎異善屬文既長登第泛交海內名流獲落無所容遂託疾遠遊慕鄒魯之風遵海岱凌日觀既乃浮淮達泗適吳徂越探禹穴躡鴈宕振衣風塵之表其意嘽嘽如也已而結屋少谷之山潛心大道

攬觀萬物之終始譬猶鸞鳳乘風九閼之上飄颻游豫
而時人莫測也夫辭榮耽寂者其志曠窮幽邈遠者其
思奇故其放而為詩也龍翔虎變波湧雲蒸備極情態
命世之詞也詳其所至正足以翼三百篇之經變可以
摹於騷漢法以準其體魏辭以則其要晉選以暢其氣
唐音以澤其和盡性情物理之懿義不詭於風人或曰
少谷詩人爾余觀少谷遺周方伯衡山高云周夫子崇
高遍博要如此平生意氣吾與爾使天假以年則事業

余莫之究竟矣少谷已沒其言立於後世死而不朽其以是夫

書少谷詩後

林民止

海內談詩無慮千家其高者乃稍取裁漢魏至叩其音節猶在滕中人謂繼之詩擬杜甫即杜甫何擬杜甫詩於古時或出入近體則齊梁之變者也夫自三百篇之不得不為漢魏漢魏之不得不為齊宋王岑盧駱者時使之也而能令曹絳談伊周之事不然矣繼之詩入以

杜甫七言變體所謂抵掌叔敖古詩綽有蘇李風致至其恬澹冲雅亦或離而去之夫詩心言燕齊梁魏無方言他或以方江南之橘江北為枳地土有然吾以為詞致可學風骨不可學此詩所以有列國之風也家大人舉僕於燕十歲過洞庭沅湘登祝融之峯飄飄乎憑虛馭風二十而對公車入邯鄲以為故土間從燕齊人語則或以為莊嶽之間者顧恨不得繼之同時於以言風為之太息

少谷詩序

謝肇淛

自三百篇之降也浸淫至於勝國蓋正始無遺音云國
初作者尚沿餘習至弘正之際然後琢雕破觚力迈茅靡時
則二三君子之功為多而吾郡鄭繼之先生其一也先
生曠世軼才其於詩有所獨詣命義舛詞蒼然古色高
足頡頏兩京下不失凌鮑謝朱絃希音研藻寡和一切
人間藻繪可憐之曲不啻沈之濮水當時與北地金昌
諸君子執鞭弭周旋海內翕然向風要其終身所至於

少陵氏可謂具體而微矣先生家食以孝友式里閭立
朝抗疏瀕九死而不回死之日家徒四壁子孫至不能
自存蓋其生平志行有足配千古者昔人所稱三立先
生兼有之非徒僅以詩不朽已也天既奪先生之年而
復辱先生之後遂令其遺言幾至漫滅余小子不勝懼
焉曩歲議與諸同志一新之而弗果後余李吳興而鄧
女高計部以搜粟來會其志適與余合遂稍為較定而
授之梓嗟乎自繪事勝而情性遠七子興而大雅衰里

中耳食之輩往往喜遠交而近攻蓋先生沒且百年而論今日始定悠悠黃河寧復可清而況乎其以下駟走者也掩卷卒業但有三歎

少谷山房雜著序

徐燾

一日偶於市肆見廢書數冊皆蟲鼠之餘余欲索觀其人謂將用覆瓿不足觀也強之始得觀則此編在焉出鄭吏部手書無疑然以印章考之知為高宗呂家所藏首易論河圖洛書次洪範論及洪範數補叙次田制論

次九章乘除法次演禽法次奇門遁甲法終以衣冠車
之制皆探賾索隱鉤深致遠非世儒所能窺測者先生
於學可謂博而精矣先生歿且七十餘年其書片楮數
行人皆珍惜况此編蠅頭萬計又闢理數之微尤可寶
也然不縻爛於醯雞者如綫哉因重加補葺秘之帳中
時萬歷丁酉歲四月十八日

鄭少谷先生集序

曹學佺

初鄭繼之先生有集刻於家其傳不廣鄧汝高為浙江

監允惟取其詩稍哀選之刻於湖州余選明詩至少谷
必欲得其全集又不能無去取較諸湖州所刻存者僅
四分之一然而選自汝高者同異亦有間矣去歲董崇
相贈余言以予方之少谷先生其少年科第棲處閒冗
以詩名號召海內者略同而末且引左氏之立德立功
立言為三不朽予謝何敢當先生萬一但考魯穆叔之
對范宣子曰魯有先大夫曰臧文仲既沒其言立此之
謂不朽按此即吾夫子所謂君子疾沒世而名不稱焉

蓋人於既歿之後其言足以垂訓與否皆聽於後世取舍之公心而其人不得而與焉故傳又云太上有立德其次有立功其次有立言凡言有者謂其德其功與言皆實有諸已故後日雖久而不廢也與夫好名之流襲取於一時而實為速朽者大逕庭矣繼之先生位不越郎署年不滿四十而其詩至今人稱之也余選其集亦殊寥寥與他名公無異而公集中之詩與何仲嘿孫太初王道夫諸名公相往復者余選之才得三二首其餘

皆擬古登眺感遇之作也然則公於一時交遊中簡澹
亦可想見而其海內以及後世顧咸趨之何哉昔之君
子不近名而名歸之信乎其有以立是言者其為德與
功又可以類推也予自度於三者何有焉故謝先生不
敢當亦以見夫名之不可以苟得而勿喪也鄭民部映
崑將重刻少谷集於金陵而問序於予余乃推所以景
行先生之意者如斯而其詩則直為言之所寄而已矣
如先生之詩則其所寄者可謂遠也已矣

鄭少谷先生集序

孫昌裔

吾閩少谷先生詩若文流傳海內已久而人尤膾炙其
詩以為得少陵骨第稍稍以步趨擬議求多當先生時
所稱少陵具體莫若空同尚亦未免斯語嗟夫先生空
同所以與少陵合者別自有在而非以詩也少陵避亂
竄歸初授拾遺即以抗疏嬰肅宗怒遷徙間關至於負
薪拾橡而愛君憂國之念未嘗少衰空同初彈壽寧後
觸逆瑾下詔獄者再矣先生以諫武廟南巡與梓溪諸

公同受杖闕下此咸以雕龍之才抗鳴鳳之節螭志足
羞龍比未俊忠憤感慨發而為詩宜乎有急調而無繁
音有勁氣而無纖態有惕思而無喬志有危論而無危
詞維柱藉支日星並耀此其不朽寧獨立言而介介乎
尚以篇章字句離合吹求所謂飛鴻已翔於寥廓而羅
者猶視夫數澤也予嘗尚論其世唐之寶歷明之弘正
乃風雅極盛之時泰否相乘之際三先生生應其期身
閱其變詩以當史匪特少陵而少陵家楚客蜀空同家

秦客汴三峨七澤增其高深九曲二華竝其神秀若夫
方巖峽岬摩霄標霞滄溟漭沆日吐月表大風而獨
霸甲震旦以稱雄微少谷先生其孰能當此者盛矣美
矣難測究矣抑予因是竊有感焉山川自有神皋亦猶
文章自有天府往昔無論明興諸方家自先生空同而
外先後不乏率皆壯湖海之氣炳河嶽之靈雄雄一時
礚礚千古述作者所宜奉以為程邇來一二輕儻必欲
菟奇剔異於赤縣神州禹跡亥步之外而以易曉易就

自文其俚淺者又相率謂口頭語眼前景即詩家絕妙詞是何異陟莽蒼之部婁汎邨塢之曲浦迴溪而遂欣然以天下之美盡在已也予友枯蒼守鄭君合刻先生詩文於南庾署典型具在遺佚悉收豈惟知玄之君山抑亦救時之東里蓋世習知先生詩而不知先生於文尤蒼潔取法嚴而持論正得之陽明甘泉兩公麗澤為多夫世寧有真文章真風節而不根極理道素篤性靈者哉天假先生以年殆將分擁兩公舉比不徒與少陵

空同稱鼎峙敢因枯蒼之請而併及之汗不至阿稍識
其大後之論先生者度不易吾言矣

少谷集序

邵捷春

予友鄭章甫重梓少谷先生集成孫曹二觀察已弁之
予復何言然世之推轂先生者徒以文若詩王弼州評
先生得杜之骨如天寶父老談喪亂事皆實際感情竊
謂少陵在唐值祿山不軌傷時感事到處皆憂西瀼東
屯流離托跡良苦矣先生當正德初立朝無幾時值閹

瑾用事屢疏乞歸築少谷草堂於鼇峯即予里也顏曰
遲清將以俟天下之清矣迨毅皇末瑾誅而嬖人江
彬又搖亂國是蒲曹卽黃鞏輩以諫南巡受廷杖先生
上疏止輦且明鞏無罪杖亦濱死故其詩一本忠孝之
忱非無病而呻吟也者顧少陵潦倒名場竟慳一第年
四旬餘始拜官卒年五十有九先生弱冠登進士未滿
四十而歿屈指少陵遇主之年先生墓櫬可材矣遲速
壽夭何其不侔惟詩篇渾雄悲壯大率相類予載觀先

生品評杜詩指摘瑕疵不遺餘力豈以吾之不可學柳
下之可欺又竊計少陵之詩意興偶觸而後世耳食者
相沿蹈襲不免畫虎之誚先生神與之契匪摹擬而得
故能掊擊而發明之如良醫得疾腠理自知自治然則
先生於少陵其即岳陽之元度成武之諸葛耶何其太
似之而更能箴砭之也先生之業不寧惟是其於易數
河圖洛書演禽遁甲莫不精詣非世儒所能窺測為文本
諸六經子史書畫又甚絕倫嘗晤文成甘泉慨然究性

命之旨躬體而力行焉如世所傳經世要談大畧可覩
即里居貽書當事殷殷不忘民瘼稍假以年俾獲大展
寧不竟少陵所未竟無如天不憖遺而遭逢以後則一
一符合者少陵工部先生吏部其生平宦職同少陵變
遇祿山先生變遇彬瑾其遭際不辰同少陵疏救房琯
先生疏救黃鞏其批鱗風節同少陵卜居浣花先生築
舍黿石其棲遁雅志同少陵歿後貧難給喪四稔始克
葬先生瘞跡梅亭松栢摧為薪其遺後清白同悲哉章

甫蒐羅詩文既備予因掇拾先生雜纂及同時贈答哀
輓碑碣詩話諸篇附之末簡用抒高山景行之意誦詩
論世者其以予言為然乎否

鄭少谷先生全集序

徐勣

吾郡自洪永間十子稱詩崛起草昧力追正始百餘年
間則鄭繼之先生布侯海內與李何邊薛諸公分鑣而
馳一意步趨浣花得其神骨譚執之士推為盛明正宗
先生詩名不脛而走矣先生壽不永遺稿散落汪福州

希周拾詩若文刻之郡齋歲久寢漉萬歷初先生外孫
林少司空督學東粵時重刻於潮陽又三十年鄧觀察
汝高稍刪汰其詩授梓而文則未遑焉汝高已化板藏
家塾近罹鬱攸之禍悉付煨燼汝高仲子道協僑居金
陵謀為重鐫甚盛心也昔曾以展墓過家與予商權今
古予性喜蓄書漁獵先輩遺文如獲重寶先伯氏惟和
曾得少谷雜著一種予得經世要談一卷遺詩一卷遺
文數十篇尺牘數十幅皆先生手錄者乃盡授道協彙

為全集方事剗剗而道協告逝友人鄭章甫官南戶曹
遂踵成之而先生雜著種種未及纂入郡觀察肇復補
而續焉又採輯先生同時贈答哀輓及墓碑詩話諸篇
附之於後夫先生弱冠登朝位非言責廼抗疏闕廷瀕
死者九其風裁行誼超越時流且好遊名山所交非海
內賢豪長者不與晉接著書立言窮乾坤象數之變察
車服制度之微使天假之以年其造就寧止於斯耶嗚
呼先生亦宇內一異人矣論世者毋徒以詩文槩先生

可也

少谷集卷二十四

欽定四庫全書

少谷集卷二十五

附錄下

詩辭類

少谷子行

何景明

少谷子在武夷之山二十抱策扣燕關朝排閭闔暮湖
海九霄萬里身翻攀豈徒聲名冠帝里要使蹤跡窮人
寰竭來京華始一識意氣形神兩相得肺腑真成水石

痼辭章亦帶煙霞色龍姿鶴性不易馴海思江情浩無
極頃將東遊觀岱宗便欲下泛滄溟中鼉風奔浪巖洞
黑鼇日壓山樓觀紅南浮江淮覽吳越復上會稽探禹
穴去鳥情生雁蕩雲飛虹夜躡天台雪波濤窈渺岑嶠
移遍訪名山入武夷仗劍不憂百怪出采芝或得羣仙
隨只今妙年始三十辭官讀書志何逸九曲煙花對草
堂三山蘿月開芸室已看鳳凰在千仞回首驂騑空萬
匹八月高城氣稍勁流鶯木葉交相映燕山遊子落日

吟海邊歸客秋風興他日遙尋少谷峰
武夷莫作終南徑

得鄭繼之書

鄭生湖海去高興渺難降累月音書數
清秋涕淚雙天邊登越嶠雪裏渡吳江
萬里千山暮何時到爾邦

寄少谷山人二首

武夷九曲上仙庭錦壘青天萬仞屏
下望神人釣鼇石北風吹霧海冥冥

台嶽中峯綵霧生石梁遙挂赤霞城仙潭尺素傳雲鯉
報爾今尋華頂行

寄題鄭少谷園

三山今有鄭公園避俗從來亦避喧蘿竹青青垂谷口
花林靄靄覆桃源天邊鴻雁春寥廓海畔蛟龍晝曲蟠
南斗尺書招隱意白雲叢桂幾攀翻

送葉生還閩中兼懷鄭繼之

葉生行吟燕市中葛巾麻鞋歲將晚兩都為客今始歸

五岳尋仙不辭遠江南畫舫春柳低海上茅堂白雲滿
谷口如逢鄭子真為道棲遲未應返

贈繼之

薛蕙

長安城中不可留風塵日日使人愁上書解印我將去
拔劍出門君且休五岳登臨幾兩屐三江來往一扁舟
東西南北好行樂與爾相隨萬里遊

遠游曲十首贈鄭繼之并序

祠部鄭少谷以病謝歸烏石山中先將抵

杭訪天台四明諸山南循浙江望閩海而返余壯其行賦贈之

烏石山中想紫芝少谷先生歸去時
贈君試作遠遊曲
較似仙人碧落辭

闕下屢移稱病書知爾不復少躊躇
海上但留雙玉鳥
山中誰見五雲車

五岳之山君遍過名山不比浙江多
赤城直上仙人闕
天姥斜連織女河

赤城宛轉石為梁雲裏振衣千仞岡
聞道台州老大守
為君先已築丹房

太白山人高士流十年不出卧滄洲爾去相逢託相訊
南來儻許共扁舟

越中會稽天下無金城玉室是仙都即向山陰覓芝草
還從禹穴探靈符

丹山赤水足華滋雁蕩龍湫更自奇招隱頓憐君去早
移文應笑我來遲

鏡湖綠水畫難成五月南風菡萏生越女舟中歌白苧
道人醉卧酒船行

海門東去片帆歸却傍三山開釣磯人間物色那能見
空向青天望少微

天地經今幾劫灰區區人世只堪哀莫漫著書拋歲月
徑須餐玉訪蓬萊

鄭繼之館內積雪為小山戲作長句

君不見少谷子饑寒卧病長安裏長安臘月雪一丈怪
爾朝來何技癢凌晨掃雪為小山數峯突出窓戶間我
時過門訪子入子也階前荷鋤立亂垂散髮雜塵垢斜

挽短衣半沾濕憶子前年覽吳越東遊四明尋禹穴慣
矜赤脚踏層冰苦覓黃精劖山雪平生好奇心未已今
朝作戲聊復爾斲冰積雪止俄頃走海驅山宛相似仄
崖崩壁色悽愴玉膏乳竇陰森爽磊砢初驚大禹鑿成
削翻疑巨靈掌君不見五侯甲第當此時紅羅斗帳流
蘇垂銅盤燒蠟絲雲散玉袖拂面香風吹吁嗟如子何
為爾低眉蹙額凍欲死

酒酣歌贈鄭繼之地官

孫一元

司徒之官不可求早年通籍金閨遊青袍只今厭奔走
兒女衣食泣道周屢見文章出翠釜未聞廊廟登天球
鄉關萬里望不及風吹離思江花愁野人勸汝蚤歸去
塵埃骯髒難為儔朝廷嬖孽未除盡早晚尚有巴蜀憂
冰雪照堦驚歲暮行人烽火多阻修天狼出明東海岸
哀凰獨叫西康州酒酣對汝不料事為此長歌歌未休
鄭繼之荃官久不過湖上奉簡

怪爾狂吟客不過湖水濱寧遭官長罵莫得野人嗔雲

外烏藤杖花邊白鷺巾相看只自好空送月華新

寄鄭繼之

少谷平生友青雲半載離豈忘吳地客不寄雁門詩嘯
傲定何日經綸須此時後期解朱紱同飽九莖芝

夢鄭繼之

不見平生鄭廣文風塵側望隔青雲殊方物色偏憐客
雨夜燈花頻夢君隔葉山鳩高自語避人江鶴獨為羣
眼中此日堪惆悵塞北音書久未聞

送少谷子繼之

少谷山人去不返，洪河素舸坐長空。一官卧病菰蒲裏，
萬里看山烟霧中海內談詩名已動。夜深說劍氣還雄，
關西野客應憐汝。君有當年季子風。

鄭繼之新着小烏巾訪予作詩戲贈

道人相見一笑同，烏巾自製誇新工。禮數懶慢政着我，
山林風流今愛公。眼前物議一時事，溪邊自照雙鬢蓬。
接羅倒戴間紅羽，何當江上尋漁翁。

憶鄭繼之

年來苦憶鄭夫子獨坐幽林興轉孤
晶晶鷗羣迴晚日青青菱葉散春湖
何時共採金鵝蘂此日君猶銀兔符
一笑滄洲終自去那堪風物眼中殊

會江與繼之聯句

張天顯

海門潮入風初勁山脚雨來雲更多

異所

龍起烟江船背

濕泥封石竹麝香過

繼之

旅懷落落銜杯酒野景蕭蕭一

浩歌

異所

倚櫂殷勤問漁父東南消息近如何

繼之

山行與繼之聯句三首

籃輿還還作山行野鳥林花不識名

所巽

出洞烟嵐遮嶺

路愁人雲樹足江城

之繼

錦囊不盡摘雲思綵筆常含題

柱情

所巽

醫國有魂招未得終軍何計請長纓

之繼

東郭西郊耨草天江南行客飽雲烟農家三兩不成井

之繼

樵擔往來自作聯泉落竹根寒漱玉

所巽

苔生谿徑綠

鋪錢翻憐病骨禁愁陣一嘯松風過大川

之繼

富陽江上水衝潮兩耳漁歌送寂寥

之繼

鷓鴣草當年歸海

上羊裘千古在山椒

巽所

沙頭蘋菜還堪薦水國忠魂不

可招

繼之

長嘅扣舷和逸調乾坤空濶鬢蕭蕭

巽所

鳳山與繼之聯句

偶上林皋覽物華東南形勝此為嘉千山北走三吳盡

巽所

一水東歸百粵賒芳草郊原新第宅

繼之

夕陽城市舊

桑麻傷情莫說宋家事

巽所

猶有臨春剪綵花

繼之

出杭立秋次日與繼之聯句

水國金風釀早秋

繼之

碧梧辭葉下滄洲波光雜雨入書

舫

異所

雲竇滿空舫旅眸蠶繭已成桑柘老

繼之

柞烟初發

稻梁收橫江忽聽一聲雁

異所

帶得關西消息不

繼之

送鄭繼之歸閩

余門人也

傷心嗟莫說南樓離思匆匆又薊州鷗鷺蘆花成午夢

雲山江月伴新愁太元語塞侯芭壯縞帶情輕季子酬

霜葉西風來日路獨憐任昉賦交游

南樓舊讀書處

菖蒲水冷菊花黃握手其如別思長敢謂傳經擬公穀

應憐作賦似盧王鵲巢未就風偏勁狼鬣頻張月自涼

君向南行吾在北高山流水永相望

少谷子歌

有引

王廷相

閩士鄭繼之詞人之豪余聞之未覩也偶覽其
遺集有及余一詩云海內談詩王子衡春風坐
遍魯諸生我昔傳聞薛吏部為君遙式洛陽城
嗟乎繼之念我深矣生也吾不及其會沒而見
其文已恨失繼之况平生有詩念余恨當何如
耶乃作少谷子歌酬之焚其稿於燕之郊望閩

海而再拜少谷有靈應鑒吾意藉此神交慰我

良友

君不見斯文天挺鄭少谷詞林閣筆推長雄六鼇之力戴
九土昆崙挂天高穹窿左日右月抱兩丸象緯炯炯羅
心胸文成直與元氣會思渴一吸滄溟空青蓮豪逸建
安骨力挽古格追鴻濛少谷子紫薇宮闕遊不盡却下
勾陳徧南北日觀振衣盼東海雁蕩天台幾眠食太白
山人許相交時人碌碌安能識少谷子汝初抱策升明

堂余已跼蹐流海荒南天北極渺雲霧紫宸黃閣空相
望彼時才俊遊帝傍信陽之何棠陵方大梁翩翩李川
甫吏部薛生尤擅場我也豈堪天下士君胡念之垂篇
章少谷子古來神交隔山海安俟目擊道乃在覽吾詞
翰魂夢飛萬丈紅霞散天綵少谷子人生電掣湏臾爾
惟有文章流萬禩眼前得失浪悲愁富貴勲華盡泥滓
少谷子人言海上多神仙羽人不死常朱顏誰其獲者
王子喬七月七日來人間君曾學道叩玄牝吹笙驂螭

應未還為君一戴雲華冠再拜贈君雙玉鬋

贈少谷子別四首

傅汝舟

首夏氣恢台草木紛苞長芳蘭被洲渚嘉植翳蓀爽逝
節悲已淫邦媛浩遐想悠悠京華道泛泛岳水漿

岳水吹景風輕槳去若失朝發茅原江夕宿水口驛潤
遵汭劍津湍石衆湍崛雖匪蛟龍驚情用或怵惕

怵惕情自怡人心重險巇嶮巇不可近傾仄孰為支豺
虎委牀帳父母宿瘡痍行矣茂道力擗哉壯士悲

壯士無還顧，離析歡絕端。
狂瀾殺隄障，歡端何繇敦。
修門切重入，衰房隱層巒。
煌煌三靈芝，遲爾同加餐。

喜少谷歸

一笑春初盡，南歸意已勞。
王風時不競，人事日相高。
雨濕菰蒲氣，風生鸛鶴毛。
柴門近湖水，知上釣魚舠。

冬夜接少谷子京使有懷

一室風顏遠，中宵月色殘。
近前問來使，別去作何官。
獻納朝還隱，冰霜國正寒。
焚香先帝日，莫掛武門冠。

元夕同少谷登鰲頂為余作據石圖

下界燃燈夕高峰接手行始知人代裏不及化王城夜色虛明滅禪心澹送迎異時對圖畫片石最含情

白龍洞少谷子題名處

城西小洞伏屋側苔深車馬塵尚拋清泉何心亦避客
白龍與世本絕交林楓妬菊倩斜日溪霧逐雨爭低坳
遲迴忍讀鄭虔字歲暮旅倦饑熊咆

送少谷上南都

岳立嵩衡竝身纓烏綬踈乞歸三疏日多病一官初載
出心應苦中興道不虛黃金懸駿骨知上玉階除

鄭少谷吏部

詩傳鄭吏部清廟歎朱絃流作南閩派光爭北斗前山
中官自達海內友多賢伯氏忌交久憐余喜執鞭

暮泛白馬湖懷鄭繼之

林春澤

返照明春湖片帆輕烟裏長空絕鳥飛汀洲見芳蒨美
人望不來春暮吳江水

西湖次鄭繼之韻

湖上尋春事天涯泛梗同角巾山寺晚白馬柳堤風澤
國吏情遠帝閤愁緒中未能從逋老莫擬哭途窮

憶鄭繼之

少谷吾憐汝形骸亦已忘飄揚四海志嬾漫十年郎玩
世惟青眼歸山有草堂且從金馬隱與爾共徜徉

次韻答方思道見寄兼懷鄭繼之張道宗

遲日思君子招携汗漫遊客疎嫌地僻官冷喜春幽青

草風烟暝空庭燕雀留何時拉張鄭披豁話林邱

病中懷鄭繼之二首

抱病秋光老懷人不可攀何時同避地羨汝蚤歸山興
遠江湖外名高天地間芳隣吾已卜為掃白雲關

衛川分手去濟上寄書來白鴈秋天沒黃花遠地開山
翁迎舊侶朝士惜高才安石終當起蒼生重可哀

答鄭繼之聞薦

聞道采薇去山中避薦書弋人何慕鴈漁父竟登車驄

馬開賢路客星明太虛長安雪霰霽遲爾到天衢

大悲寺次鄭繼之韻

故人萬里去倦客亦思休
悵望滄洲遠遲迴野寺遊
閒雲依淨土爽氣似清秋
霄漢慚孤鳥人天意白牛
哀詞長激烈歲月祗淹留
擬約鷓鴣夷棹滄波天際流

雨中憶鄭繼之草堂

獨上孤亭憶草堂
野雲度峽望微茫
鷓鴣啼歇山橫雨
白鷺飛來水滿塘
病起尚緣詩思瘦
秋高偏為客懷忙

翠旗峰下吾廬舊何日林陰掃石牀

喜鄭繼之青野堂成

芟湖青野草堂新萬里雙魚慰我真錄事無貲堪寄遠
裴公未老便投身紅塵走馬慚羈旅滄海冥鴻笑弋人
天上春風正遶汝白雲他日結芳隣

夢中懷鄭繼之得江上漁舟忘歲月雪中鶴氅
似神仙之句覺而足成

塞雲飛鴈下遙天旅夜懷人入夢邊江上漁舟忘歲月

雪中鶴氅似神仙
南宮文物思前輩
北塞風塵異昔年
木杅淒淒霜月裏
故山何處意蕭然

次鄭繼之南湖舊居

鄭鵬

使君湖上宅
面面俯淪漪
魚鳥酬相狎
烟雲靜與期
畬人供谷竦
漁父課鷗鷺
一被塵纓縛
悠然繫夢思

送鄭少谷之留都

林庭枝

湖上逃名獨養高
彈冠此日聖明遭
宦情已似錢郎薄
詩興猶如杜老豪
雨後菊花含別思
風前木葉點征袍

仙舟無那飄飄去愁對江湖首重搔

答鄭禮部繼之

顧璘

寥落混風塵憐君意獨親同吟山郡雪稍醉帝城春
海月通幽思宮鶯啞遠臣期尋石梁去還待謫仙人

雪中鄭少谷黃石龍過郡

大雪滿山城驚聞屐齒聲本非安道室真接剡溪情
小閣梅花笑寒燈秫酒清相看興難盡樓鼓下三更

送鄭繼之歸鰲峰

四月燕山雨雪寒省郎多病復辭官路經海上三神島
興在仙人九轉丹玉洞桃花留笑靨滄江秋水濕漁竿
爾家谷口空長往安石東山望未闌

夜坐鄭子宅彈琴

王廷陳

言訪少谷子呼童携素琴為發絲桐趣俱諧山水心徑
轉松篁密堂虛風月侵再彈吾不惜此地有知音

贈鄭少谷

汝昔辭郎日堂齋谷口尋經年種松菊携客遠登臨澤

傍蛟龍窟巖穿虎豹林朝朝泛烟艇夜夜宿雲岑竟被
蒼生起俄驚白髮侵屢遊天姥夢時動越鄉吟障貌東
南美琴留山水音乾坤倦鳥翰歲月狎鷗心骯髒違朱
綬疎慵本素襟異時筋力在去矣極高深

懷鄭子

鄭子客遊淹吾廬詩詞間作真起予憶當出門與結束
欲別上馬仍躊躇計月能迴楚水權經年竟斷燕關書
人生歧路恨南北塵暗望眼何絲舒

贈鄭少谷

陸深

少谷吾年長凌雲爾不如庭中積秋雪爨下泣枯魚舊
隱青山宅初寮畫省居揚雄甘寂寞白首太玄書

哀輓詩

讀少谷遺稿

曹嘉

少谷詩三百流傳與細吟朱絃在清廟三歎有遺音歷
代空多選諸唐抵似今明珠吾已得竊照草堂深

又

顧可久

海內詞華士風流未似君遊情到滄海飄思入青雲備
見前賢體高垂一代文秋齋夜深誦白露散清芬

又

周廷用

平生不識鄭台州海上相尋竟未投豈為文章傳麗藻
却因儒雅擅風流十年夢想南州竝此日儀刑北海留
更抱麟傷千古意不勝清淚灑丹邱

望少谷墓二首

不見高人揚子雲山川到處動遺文眼前金匱誰能識

獨有侯芭為起墳

玄塚累累荆棘荒夜臺何事葬文章
長松老檜參天起喬木千年表鄭鄉

過經院讀少谷詩

汪文盛

瘴雨炎蒸午未深斜穿幽徑過禪林
靈山日傍孤城轉閩海雲生廢殿陰
苦憶舊遊誰在眼讀殘新刻倍沾襟
抱琴那有鍾期意掛劍徒懸季札心

讀少谷詩集四首

鄭慶雲

晉陵松檜風雲合吏部文章日月明
讀盡遺編人不見
晚風疎雨暗長檠

憶昔長安結騎時青雲回首我來遲
孤燈對坐澄心處
畢竟原無一字詩

少谷經綸竟若何眼前花鳥自酣歌
時人莫作詩人看
杜甫憂時涕淚多

閩嶺音書隔歲年心期相失秣陵前
為懷國士雙沱淚
直與東流到海邊

聞鄭少谷訃音

祝鑒

少谷知心友祠曹攜日遊才名聞海內氣槩邁儒流每
抱長卿病猶多杜老愁可憐今已矣詩草為君投

夏日讀少谷詩

葉鈇

日永官閒午夢深暗香風細度晴林壓簾遙送南山影
隔座斜連北閣陰詩到讀殘知客調意當戡破識胸襟
一時同異人如玉空谷音長驗此心

宿歸雲庵和少谷韻

林鈇

翠屏金界夜光飛，星宿低搖白石扉。
高木嘯風吹月小，蒼林滋雨抱花稀。
巖前丹室悲空劫，海外閒雲去共依。
細拂霞文青壁滿，短晨長涕鶴雙歸。

讀少谷集兼悼白浦后峰二首

別汝芋江去，翻悲絕命時。
英雄偏短世，吾道復奚靈。
氣山川颯爽，文章天地私。
欺危見妻子，揮淚益淋漓。
竝哭朱黃死，今歸哭女堂。
頻年淪益友，一代慟人亡。
鰲泣金峰暮，星沉紫斗芒。
巖廊邱壑已，名世恨琳琅。

哭鄭少谷先生四首

陳鑑

少谷今淪沒乾坤有幾人
文章餘正氣河嶽失精神
出入居三省歸來卧四春
空悲吳越暮涕淚隔風塵

文星隕南紀東觀惜豪雄
言足裨綸綍詩堪繼國風
高情遺札在幽憤白雲空
想見柴門色蕭條青桂叢

二十登黃甲三朝侍紫宸
才高何命薄官久只家貧
管輅聰明天廡翻骨相屯
汙如來白馬執紼越江濱

勝友今難得平生鄭與孫
能文俱喪逝灑淚一乾坤
白

日青天暮有懷無處言春花幾萬樹落盡不開門

又

釋明秀

病裏驚聞盡一哭千年交誼竟何哉江關兩地空遺恨
猿鶴三山亦慟哀谷口柴門長落日平生知己獨憐才
臨風欲擬招魂賦猶憶西湖舊日來

少谷高人無日起百年清淚幾時收嗚呼滄海談詩夜
翻作延陵掛劍秋詞賦永留山水興謀謨空切廟堂憂
交期猶想錢塘別心折風帆送客舟

又

釋戒言

鄭公已長逝物議更無誰一病辭明主三秋淹桂枝經
時風獨振憂國賢將衰紫闕期班鵠蒼雲忽駕螭此辭
哀有托宣室召無時天喪斯文戾才難志士悲高人多
汨沒大雅日陵遲一識平生願終身是我師心傷春寂
寂悵望淚垂垂絮酒徒興念滄溟隔武夷

和勾谷哭少谷先生

方豪

憶自胥門外風前見玉人清操能信僕妙思直通神丹

楫三江月衣冠滿座春回頭吟嘯地萬事總成塵

憶自分吳越君才十倍雄還朝了公事秉筆振文風憂
世經旬病耽山萬事空遲清亭上月猶照菊花叢

憶自風沙起重逢覲玉宸軒楹同擇里衣食互資貧被

杖矜身壯揅著知命屯

公嘗揅著知三十九歲必死故決策歸去

飄然復歸

去終老白湖濱

憶自中峰寺詩僧狎祖孫

雪江為祖戒言為孫

掀髯弄江海拍掌

笑乾坤行色竟難挽離愁何可言誰知松樹底已作死

生門

和雪江

少谷先生天上迴人間安得久留哉先生自有神仙樂
人世空爲兒女哀似此英雄還短命不如造化莫生才
棠陵舊約應牽掛白日乘雲望汝來

清世鳳麟隨地有皇家疎網未全收可憐薦稿施行日
卻在病身狼狽秋養就英賢嗟莫用事關邦國轉多憂
誰知瀕死猶趨命力疾支吾建水舟

和戒言

爾去嗟何早吾歸更與誰坐驚梁月色淚灑野花枝海
內人才少天南文運衰朝陽思鳳鳥夜雨泣蛟螭宗祀
方髣亂閨門總盛時交深宜我託遠道付空悲膝下斑
衣獨墳頭白馬遲荒山甘寡陋舊業失師資遺德千人
仰雄文萬世垂景公多駟者不及一齊夷

清明登少谷墓

海國清明祭掃紛誰人獨拜鄭公墳迴峰仄徑迷青草

短褐孤臺覆白雲
濺淚山花空自媚
喚愁野鳥不堪聞
莫言身後俱寥落
天地長流少谷文

寄輓鄭少谷先生

詹璞

真宰茫茫失主張
英雄如子可淪亡
生依丹闕心應赤
死入黃泉骨尚香
李杜詩名堪伯仲
班揚文思孰低昂
生芻萬里無繇致
未賦招魂已斷腸

玉樓促記即登仙
猶憶新詩祝壽年
賈誼已無宣室召
相如空有茂陵阡
吾思君谷情何極
君志吾厓句尚傳

先生嘗為余
題吾屋卷

千古知心惟鮑照東風凝佇淚潜然

哭少谷詩五首

林春澤

艤櫂春湖上蕭蕭青野堂桑田忽以變松菊亦無光
末世風騷遠斯文骨肉傷平生知己淚哭汝白雲長
執紼向何處青山白雨邊名高天亦忌道重世爭傳
江漢先歸日英雄不盡年梅亭有豐碣終古麗雲烟
少小慕儔侶論交爾獨深百年兒女眷四海弟兄心
白日收真氣黃鍾輟太音江門空老我落葉滿秋林

零落辰星後斯文失主盟病多憂國淚出為薦書行宇
宙浮精爽江湖問姓名彭殤非壽夭不朽是長生

峴水秋仍社招尋不見之星河成永訣涕淚倍交頤命
苦賢人短天將吾道衰茅容黃榦意獨向月中悲

哭少谷年兄先生

陳墀

痛惜鄭夫子高才與命妨道因儒術重詩遍士林揚今
古修文地乾坤傀儡場不堪生死別涕淚滿衣裳

廿年同榜客一別幾經秋我愧留徐劍君應賦玉樓江

流終古恨霄漢此生浮悵望南湖路風烟黯不收

邳下遇少谷計

王希旦

遠計臨深夜長風悄客燈病魔回玉女道否失金陵雲
谷心長在杜陵壇可登此生寧化物天地寄除乘

哭鄭吏部繼之

王昺

少谷真死矣傳聞久尚驚文章憎爾命造化忌人名出
處道何愧經綸志未亨獨餘遺稿在山岳共崢嶸

少谷墓下雨夜感懷

傅汝舟

良友竟亡悲鳳死遺編雖在泣麟窮休論十載追趨地
只漫千山夢寐中青草漸生今日雨白楊時動故園風
撫墳豈稱酬知己愁絕春原薜荔叢

冬日過少谷墓下

高澂

一自玉棺葬西麓歲寒空為掃楸梧心悲白日猿偏哭
氣逼青陽鳥亂呼生死丈夫元不二妻孥友道竟何孤
終傷泉路同幽憤未信人間有至愚

和高子過少谷墓韻

汪文盛

岑寂買山增感慨艱難營葬力枝梧梅亭碑在秋猿嘯
青野堂空暮雀呼義重遺言猶在耳心慚白日敢欺孤
百年公論終難泯萬古人心不可愚

過鄭少谷吏部墓

徐燾

荒墳不計年過客淚潛然朽骨藏於此吟魂何處邊
野狐啼暮雨石馬卧秋烟安得斯人起重令大雅傳
西郭塚累累經過下馬誰先生一坏土詞客百年悲
藤護將崩石苔封未斷碑應知靈爽在嘆我不同時

又

陳薦夫

寥落野城西悲風亂鳥啼荒墳樵豎識豐碣郡侯題磨
滅名猶在榛蕪路欲迷尚餘靈秀氣長此伴虹霓
梅亭多舊隴獨識此間墳諫草傳青漢詩名戾白雲骨
應何日朽地見幾家分東里西華意蕭條不可聞

又

徐 煥

昔賢寧復起大雅久無聞黃土空銷骨青山不葬文精
靈沉夜月吟咏冷秋雲詞客應相識詩成墓所焚

風流山吏部白骨闕泉局異代思相見千年不肯醒松
楸護靈氣川岳暗文星墓隧何人掃遺篇又殺青

又

陳仲湊

詞客去不返荒邱空暮烟亂藤纏古隧落葉雍寒泉恨
不同時見徒增異代憐青山多白骨獨識大夫阡

挽少谷吏部

馬陞

未識人宗面詩名已慣聞梅岡三尺土少谷一堆墳可
是天生數應憐鬼作羣縹囊餘舊業不忍讀遺文

哭鄭吏部繼之

陳沂

少谷美自匿吐氣常不勝鬱思不易發抱萼丹艷凝無
意向珪組蕭散結儔朋明星忽晨隕悲歎撫吾膺

過鄭吏部繼之墓

陳椿

才名稱吏部遺墓委郊原起草孤忠盡摘華雅道存秋
風愁立馬落日慘啼猿誰掛延陵劍枯枝灑淚痕

邱封臨野嶠登陟想伊人路聽樵童入碑看處士隣生

芻一以薦宿草幾經春歎息殘編在悲歌倍損神

墓與傅汝

舟為
隣

梅亭過鄭吏部墓

陳鳴鶴

孤魂長不寤
灑酒對荒邱
生死人千載
江山土一抔
夜臺寒薜荔
春雨暗松楸
他日滄洲意
從君地下遊

過鄭吏部繼之墓

鄧原岳

繫馬梅亭下
懷賢落日邊
蘭摧仍此地
鶴化是何年
草已沒殘碣
雲還迷舊阡
臨風一掬淚
感激向重泉

過鄭吏部墓

袁敬烈

落日暝烟收淒涼閉一邱生年無四十姓字有千秋孤
嶺寒猿嘯空山過客愁可憐風雨夜蕭瑟是松楸

空林閉白雲深樹易斜曛詞客當年淚先生絕代文藤
蘿牽斷碣孤兔走孤墳向夕悲風起淒涼不可聞

讀外曾祖鄭少谷詩

陳勲

風騷久不作大雅日已斁聖代儲元精含耀鬱未吐自
從洪水來作者紛馳騫體裁非正始色澤勞雕塑皇皇
成弘日輝輝奎壁聚埽地抗前旌信陽繼高步鄭公參

其間同聲乃響赴公也東南英道真夙所悟七星羅心
胸明月開寶璐古意逼鼎彝正音發韶濩二十登省郎
蒿目籌世務豈緊驚俗文緬懷濟時具皇圖值中微國
事方多故攬搶直紫清九土風塵暮公時諫羽獵抗疏
天爲怒且辭北闕雲歸卧南山霧波沲憂國淚一一沾
毫素千秋杜陵老餘子不足數性本愛名山靈境窮杖
屨萬一遇安期白日生毛羽長卿苦抱疾尚平須畢娶
服食願多違徵書飛已屢終懷子牟戀敢忝南陽顧病

纏劍水舟劍瘞城西墓文章滿穹壤鬼物亦可護麒麟
翳鳳凰有識誰不慕如何蜉蝣者乃欲撼大樹萬古江
河流徒嗤爾曹誤小孫抱微尚燥髮誦佳句懷公青野
堂頻望南湖路斯人今代無天地莽迴互

過少谷先生桑苧園

林 滙

廿載曾傳有此園離城十里不聞喧南湖舊隱行人少
吏部高風故業存桑苧影疎池水涸薜蘿陰密稻花繁
書籤藥圃歸何處惟見江鷗日到門

過少谷先生南湖故宅

高兆

康陵久已終王氣
吏部長留一草堂
春色南湖空悵望
浮雲北闕好悲傷
階前芳樹飛啼鳥
門外青山過夕陽
回首當時此遊讌
詩名吾祖忝齊行

予從祖石門公與先生有泉石之契

弔鄭少谷先生墓

陶澂

漢代直臣推汲孺
先生遭主不同時
迴鑿事業空餘骨
竝日聲名總付詩
草岸旁樵采盡
夕陽天外雁歸遲
行吟獨苦真無賴
但欲逢人哭斷碑

墓石近為盜所竊鮮有存者

過少谷先生故址

許琬

吏部風流昔莫當歸來三十厭為郎
曾傳諫草迴龍狩
尤羨詩名絕雁行
廢埽土花團
曙露荒林石鼓咽
春陽
聖朝耆德悲湮沒
無復南湖舊艸堂

又

陳日浴

鄭公隱處傍南湖
龍首橋邊故宅無
空地悲風惟蔓艸
寒林落日只啼烏
聖朝有道全耆舊
大雅中衰重楷模
寂寞不勝今昔恨
幾迴吟望獨躊躇

又

王子彪

曾聞吏部南湖隱十載幽居似子真
碧水青山甘自老
海鷗江鶴日相親
中朝久切蒼生望
一疏終全烏角巾
故宅已空時代異
到來吟眺獨傷神

又

陳遘

吏部幽棲何處尋
越王臺下白湖陰
荒墟歲久從殘草
落日風悲滿舊林
畫省曾聞多補袞
滄洲已分早投簪
至今客子空搔首
不見斯文感慨深

又

陳九皋

表閭通德識名門林壑清風尚有邨遇世青雲登獨蚤
致君丹檻折還存荒墟日暮供羈馬寒雨春淒送斷鴻
我忝文孫姻婭誼一來憑弔幾傷魂

讀鄭少谷先生集

馮祖快

儒臣風節至今傳抱質懷文竝古賢封事幾騰留正氣
才名獨步憶當年時危總擬歌招隱道直何妨欲問天
更羨後人多繼起表揚大業有遺編

讀鄭少谷先生全集

余颺

少谷山人杜甫流片言隻字重千秋七經剗剗多新稿
屢換宮商合故謳萬丈光芒騰日月諸家評說比墳邱
斯文未喪填河岳自有名巖定去留

吾閩詩盛永洪間十子已登高啓班獨步江東推少谷
頡頏北地屬三山黃河積雪水凌動幽澗攢巖石骨斑
此皆評先
生詩品攬卷悠然思古道景行殊自愧愚孱

鼇峯頂上昔曾遊丰采遺風嘆莫求驟諫突逢明主怒

掛冠歸與洞仙遊遺文留作高山秘故魄猶驚北寺收
天壤令名公自得拚飛小鳥點佛頭

六飛馭輦勅南乘斷朝宮門恨未能臣節不隨草木朽
諫章直共雪霜凌當年時事真天寶不覺歌聲逼少陵
憑弔遺編多感慨百家異說等蟲蠹

董賈才名昔少年步莊驟左盛無前執言忠孝生成史
抗志烟霞蛻得仙五福文人難具備令名後世自當全
至今同作文章看尚有英風啓後賢

又

余全

孝武兩朝多作者扶輪掉鞅逢大雅西涯老子首蜚聲
臺閣雍容鳴韶夏北地崛起霸詞壇手提牛耳不肯下
同聲酬唱徐與何雲衢并轡馳天馬當年海內正昇平
東南竹箭秀羣英閩海雄風壓吳越少谷首繼何李鳴
赤城霞起映天表黃河水積鬱岫峻崆峒山上武夷頂
萬丈光芒共抗行我嘗追覽誦遺集荆玉隋珠珍什襲
一吟再唱有餘思忠愛淋淋垂篇什世人不解讀公詩

遺篇歷亂恣評譏無病呻吟昇天寶千秋耳食真可疑
君不見南國翠華去不還年年黃竹望回鑾手披赤章
奏金闕長安一疏鳴鳳鸞復不見雙袖歸來風莫莫鰲
峯山頭人綽約陸離長劍華陽巾先輩風流今不作噫
吁嘻綜公遺事讀公詩如公真不愧拾遺千年詩案談
未易細與後人討論之

雨夜讀少谷公奏草有感

任夢麒

展卷餘春夜思公半雨天憂時甘死諫樂聖乞歸田散

髮南湖上行吟青野邊堂懸惟舊榻藥裹牛書籤漢主
徵逋久長沙起少年愛君西北向返素武夷前迴棹寒
雲冷空堂暮靄連龜魚非故主燕雀傍誰翻按古堪千
歎哀今每百泣何人當接武收拾茂林阡

哭少谷公

侄孫日近

執戟歸何處魂招未有蹤乾坤一死盡事業半生逢此
日搜遺草他年憶舊宗人琴不可作雙淚掛堂封

恭讀少谷公集有感

玄侄孫衍祖

憶昔吾宗全盛日文章冠蓋動京華祇今海內稱才子
猶向閩南溯世家司馬著書終自序陸機先德應堪誇
漫言率祖源流在敢擬當年杜浣花

謝諸公題詠

玄侄孫 磊

先朝吏部家乘遠故宅虛無野水濱江鸛自當門徑浴
林花空傍土墻新諸公不鄙遺佳句顧我無能忝後人
迴憶武皇南狩日諫書尚在淚沾巾

感詠少谷公集

玄孫芳標

湖上簪裾固自繁
睠懷吏部讀書園
三朝忠孝文章在
千古才名俎豆存
雪滿柴門餘舊跡
水深村溆長新痕
祇慙祖德真難述
展誦遺篇每斷魂

過少谷公鼇峯草堂有懷

元孫芳楷

共道鼇峯勝
登臨半不禁
地靈留古蹟
堂廢入林深
芳徑思延客
餘香憶在陰
陟巖頻顧睇
緩步細沉吟
不盡簾櫳杳
無窮文藻森
南湖培世澤
書劍百年心

讀少谷公諫草偶感

五世孫睿

吾宗自昔擅文風，節義爭傳吏部公。
二阮瓊林同寵宴，千秋諫草抒精忠。
方知許國襟期素，不僅專家字句工。
薰盥祇今開卷讀，宛如謦欬在空中。

祭少谷公墓感懷

五世孫克燦

春風卷靄護梅亭，碧草芊芊一望青。
幾代鴻名光史冊，兩行華表聳荒塋。
鷓鴣啼處聞先訓，杜宇聲中感舊靈。
深愧未能繩世德，祇循蘋藻露霜馨。

少谷集卷二十五